

楞嚴經勢至念佛圓通章疏鈔

清浙水慈雲灌頂沙門續法集

其七
引

念東高先生千里東余自謂年來一味淨土
娑婆境風浩浩真如詰草堂清皆不免蹉跎
勉余留心此件余偶舉示百寧法師而法師
先有勢至念佛章疏鈔在余案頭兩人取卷

甚

重閱盡然興嘆謂高先生以身踐爲救時之

藥語也遂命兒子募資刻之刻既竣法師復

謂余弁其首余惟華嚴大經德雲首宣念佛
法門馬鳴菩薩立論之祖念佛與止觀並重
而楞嚴爲譚性之書然勢至念佛一章列在
圓通禪宗下不能抑蓮宗爲非歸源見性之
途也明矣今彌陀疏鈔龍舒淨土等文布在
禪林惟勢至章僅附本經而未有耑行之疏
法師詮文釋義勒成一書爲震旦人添一重
往生舟筏不可謂非淨土之功臣也又明矣



清刻龍藏佛說法變相圖

遂以此意復高先生而繼之以臆說云蓮師
云念一佛名換彼百千萬億之雜念也卽念
卽空居然本體非於念外別得菩提又云執
持名號至於一心則復還空寂之體又云當
知淨土唯心更無外境自性還歸本體是願
生彼國義如是則蓮師雖極力主張西方淨
土而不遺宗門見性之旨彰彰如是矣則謂
見性爲淨土指歸而淨土爲見性入路未相
違也見性則掉臂皆淨土而蓮臺自不消說
不見性則淨土非了手而種因要自不退然
則見性與不見性而念佛修淨土皆不可忽
也此義似本章所未及言既以復於高遂筆
之此以質諸真能念佛人爲何如也

康熙庚申長至錢唐戴京贈書

大佛頂首楞嚴經大勢至菩薩念佛圓通章

唐 天竺沙門 般刺密帝 譯

大勢至法王子與其同倫五十二菩薩卽從座起頂禮佛足而白佛言

我憶往昔恒河沙劫有佛出世名無量光十

卷二

二如來相繼一劫其最後佛名超日月光彼

佛教我念佛三昧譬如有人一專爲憶一人專忘如是二人若逢不逢或見非見二人相憶二憶念深如是乃至從生至生同於形影不相乖異十方如來憐念衆生如母憶子若

子逃逝雖憶何爲子若憶母如母憶時母子歷生不相違遠若衆生心憶佛念佛現前當

來必定見佛去佛不遠不假方便自得心開

如染香人身有香氣此則名爲香光莊嚴我本因地以念佛心入無生忍今於此界攝念

佛人歸於淨土

佛問圓通我無選擇都攝六根淨念相繼得

三摩地斯爲第一

楞嚴云佛告阿難若復有人身具四重十波羅夷瞬息卽經此方他方阿鼻地獄乃至窮盡十方無間靡不經歷能以一念將此法門於末劫中開示未學是人罪障應

念銷滅變其所受地獄苦因成安樂國則此章經誠爲銷罪之巨冶愈病之靈丹修心之捷徑求生之要術也若能常持無苦不除無樂不與無願不遂無果不得凡見

聞者宜
三復焉

日誦式

人有三等一者極閒人應當晝夜六時持經念佛二者半閒半忙人應當每日

晨昏二時一心持念三者極忙人應當

每日晨朝一時專心持念誦時之式先本師三稱次舉勢至章一遍往生咒三遍讀佛偈一遍佛名百聲千聲萬聲隨意三菩薩名每各十聲後發願回向偈一遍未誦前已誦後俱要對聖像前求果能如此常行無間佛必哀憐凡有求接引徑生極樂矣行者當生信願切勿光

疑忽此明每日經佛並舉式也若單佛
名極聞者除六時外應當時刻念佛無
間半開半忙者應當忙裏偷閒十念念佛此
佛極忙者應當忙裏偷閒十念念佛此
方名為不虛度也盡此一生一日無有
暫廢則自念佛心口當必成佛心口經

云行與佛同受佛氣分入如

來種觀爲佛子不其然哉

次勢至章畢

南無本師釋迦牟尼佛

稱

舉往生咒

南無阿彌陀婆夜一哆他伽哆夜二哆地夜

他三阿彌利都婆毗四阿彌利哆五悉耽婆

毗六阿彌利哆七毗迦蘭帝八阿彌利哆九

毗迦蘭哆十伽彌膩十一伽伽那十二枳多

迦利十三娑婆訶十四

不思議神力傳云持咒之法淨身漱口然
香佛前晝夜六時各誦三七遍能滅五逆
謗法等罪誦滿三十萬遍卽見阿彌陀佛
彌陀疏鈔云若有善男子善女人能誦此
咒者阿彌陀佛常住其頂日夜擁護無時
怨家而得其便現世常得安隱臨命終時
任運往生

次舉讚佛偈

阿彌陀佛身金色 相好光明無等倫

白毫宛轉五須彌 紺目澄清四大海

光中化佛無數億 化菩薩衆亦無邊

四十八願度衆生 九品咸令登彼岸

南無西方極樂世界大慈大悲阿彌陀佛

百千

萬聲隨應

南無觀世音菩薩 南無大勢至菩薩

南無清淨大海衆菩薩

各十後舉發廣
稱回向偈

我今稱念阿彌陀真實功德佛名號惟願慈
悲哀攝受證知懺悔及所願往昔所造諸惡

業皆由無始貪瞋癡從身語意之所生一切
我今皆懺悔願我臨欲命終時盡除一切諸
障礙面見彼佛阿彌陀卽得往生安樂刹願
以此功德莊嚴佛淨土上報四重恩下濟三
途苦若有見聞者悉發菩提心盡此一報身

同生極樂國十方三世一切佛一切菩薩摩

訶薩摩訶般若波羅蜜一
遍
此當對佛聽念
急畢起身三禮

此當對佛跪念
畢起身三禮

此當對佛跪念
畢起身三禮

退而

此當對佛跪念
畢起身三禮

偈云一日無常到來方知夢裏人萬般將不去唯
有業隨身如是萬般將不去官爵財寶屋宅田園衣
服飲食乃至嬌妻愛子無常到來都是將不去者如何
是唯有業定慧施五戒十善業無常到來盡皆
緊隨你者楞嚴云臨命終時未捨煩惱一
生善惡俱時頓現惡者便感三途苦報善
者便感人天樂報若善心中兼有信願念
佛求生便現極樂佛土境相行願品云是
人終時一切諸根悉皆散壞一切親屬悉
皆捨離一切威勢悉皆退失象馬車乘珍
寶伏藏無復相隨唯此願王於一切時引
導其前一剎那中即得往生極樂世界見
彌陀佛及諸聖衆既然如是何不趁此強
健之時努力勤修善導云假饒金玉滿堂
難免生老病死恁汝千般快樂無常終是
到來惟有徑路修行但念阿彌陀佛設待
臨終方悔悔之於後將何及乎奉勸諸人
及時修進生死事大無常迅速慎勿以此
爲分外也

生彼土乃至十念失得往生信報生人天福盡還墜信一生樂土永不退轉當成正信覺信一稱佛名能滅八十億劫生死重罪迎二者願願消業障願滅衆苦願心開願見佛願淨業成願生安養願授記願度生三者行身禮像口稱名心觀想俱要專一絕無散亂解知信願時蓮花種植也專念時蓮花出水也功成時蓮花敷空也設起疑退心蓮花又萎矣由是晝夜六時無有一念貪戀在娑婆凡起居衣食語默動靜皆不忘淨土至於臨命終時應當念佛發願不得怕死貪生常自念言我現在身衆苦交纏不淨流溢若得捨此花池托質受無量樂事極稱意如脫臭弊之衣得着珍御之服萬緣放下身心解脫纔有病患莫論輕重便念無常一心待死卽屬一切人凡來我前爲我念佛不得雜說世務家緣長短再延法師頻來誠勸依經指示及到病重捨報之際家人親屬不得哭泣并發悲歎懊惱之聲猶恐惑亂心神忘失正念但高聲朗念阿彌陀佛守令氣絕神逝方可舉哀若如此者萬求萬生必無疑也復有遇障難者不得正念往生如偏風失語狂亂失心水火雷擊蟲獸鬼噉毒藥陣亡怨賊王難亦應預懺必蒙佛護蓋念佛者有六勝益一諸佛菩薩護念彌陀住頂放光諸天神將晝夜冥加二惡鬼毒藥皆不能害三災八難咸悉消除三宿障冰清怨命解脫四氣力充滿無諸橫病五睡夢吉

祥見佛色像無有非人奪其精氣六現爲
一切禮報臨終三聖接引故知日常一意
必念佛卽爲預備不虞法矣如人入城幹事
先覓下處者預修淨業也抵暮昏黑則有投宿之地
限到來也有投宿地者生蓮花中不遭
難也人若依此用心臨終定得往
生此又爲修淨土者之至囑也

慈雲香嚴行者續法述勸

楞嚴經勢至念佛圓通章疏鈔卷上

清浙水慈雲灌頂沙門續法集

釋此一章大分爲三①初通序大意二②

初詳申旨趣三③初通序念佛宗致

大矣哉念佛之爲法門也大小並收利鈍均

基七

六

攝事理圓融性相無礙卽佛是心無一心而非心佛卽心是佛無一佛而非佛心心一憶也佛佛全彰佛一稱也心心頓顯無有心外佛爲心所憶亦無佛外心爲佛所稱衆生念佛佛在衆生心內佛念衆生衆生在佛心中是心作佛心不念而佛不作卽佛顯心佛不稱而心不顯則知念佛一門誠爲見性成佛之妙法矣

大下分二先釋又二初總明該攝大矣哉者能讚詞亦是發語之端也念下所讚法

初句標體念佛別也法門通也大等四句釋相初二句人也大小約乘利鈍約根並收均攝者化導小乘回小向大勉進大乘捨權歸實使上根三心一至誠心二深心三回向發願心圓發直入無生令下根十念成功亦生彼國次二句法也事理約行性相約諦圓融無礙者下愚着事而迷理小智執理而遺事今則通乎理事依理修則證真諦而見自性彌陀依事修則證俗諦而生極樂相土卽下二別顯不二中先心佛不二初四句約性起心佛開五句一心外佛佛外心二心內佛佛唯心三心卽是佛佛卽是心四心非是佛佛非是心五心佛圓融無障無礙五教如次配知今明第三句義也此之心佛全體遍收如金與器以金收器器

無所遺以器攝金金無不盡心一下八句
約修顯心憶佛佛稱心皆明修也心憶佛
彰心卽是佛故佛稱心顯佛卽是心故無
爲心憶心外無佛故無爲佛稱佛外無心
故華嚴廻向品云無有智外如爲智所入

亦無如外智能證於如正此義也衆生下
後三無差別謂心佛生三無別也初四句
正明無別衆生念佛者諸佛心內衆生念
衆生心中諸佛也佛在生心內者衆生心
外更無別佛以佛真心卽衆生真心故此
明因門攝法無遺也故云衆生念佛現前
當來必定見佛華嚴亦云應知自心念念
常有佛成正覺何以故諸佛如來不離此
心成正覺故佛念衆生者衆生心內諸佛
念諸佛心中衆生也生在佛心中者佛真

心外更無衆生以衆生真心卽佛真心故
此明果門攝法無遺也故云十方如來憐
念衆生如母憶子佛性論云一切衆生悉
在如來智內以一切衆生決定無有出如
如境者並爲如來之所攝持據清涼疏開

成四句一諸佛心外無別衆生二衆生心
外更無別佛三佛心生心兩存齊現四生
心佛心互奪雙亡今且約前二句明也是
心下四句躡前反顯心本是佛由不覺而
佛隱若欲作佛須當念心故起信謂衆生
本覺與佛本覺無有二體若不念心難成
佛矣佛本是心因無明而心暗若欲顯心
須當念佛故華嚴謂佛智廣大遍衆生心
衆生語言皆悉不離如來法輪若不稱佛
難明心矣則知下次結彌陀卽是自性淨

土全唯一心離心性外毫無可得若能憶念卽顯本性佛矣起信云法界一相卽是如來平等法身性佛一顯果佛自證故圭山云今知心是佛心定當作佛不其然乎設離念佛門外而欲速見性成佛者是捨其近易以求諸遠難也

(丙)二別顯此章所詮

所以十二如來號曰三昧勢至菩薩標爲圓通三昧則總攝諸禪圓通則具足萬行一心頓實不亦宜乎

所以下分爲三初正顯所以者承前起後之辭十二如來號念佛爲三昧者凡夫垢心混若黃河外道妄想逸如奔馬故說三昧欲令返染成淨捨散入寂也勢至菩薩標念佛爲圓通者小乘七生斷惑證真權

教三祇具因滿果故說圓通欲令速證疾成圓超直入也三昧下二重揀謂此三昧總攝世出世間一切禪定揀非餘三昧也如一巨冶鑄成千器圓通具足八萬四千一切觀行揀非餘圓通也猶阿伽陀總愈萬病末二句三勸誠三昧實教所詮圓通頓教所詮學頓實教者是其所宜也又上顯圓義此兼顯頓實衆生念佛定當成佛實也起信云專念阿彌修善回向願生彼界終得見佛華嚴云臨命終時諸根散壞唯此願王引導其前卽得往生見彌陀佛蒙佛授記不久當坐菩提道場成等正覺衆生憶佛現前卽見頓也佛藏經云無覺無觀名爲念佛無想無語是名念佛摩訶般若云菩薩摩訶薩念佛不以色念不以

受想行識念以諸法自性空故今兼顯此
故頓實者宜應學也

四三引取勝益勸修

聞說佛名威光證入於無盡憶想佛境德雲
解脫於多門有此勝益應當信行何得自暴
自棄不願不修耶

聞說四句初引明說佛名者華嚴云勝雲
佛現時寶華林中出說三世一切諸佛名
號音聲時彼如來於衆會中說普集一切
三世佛自在法修多羅入無盡者華嚴云
勝雲佛所證得一切諸佛功德輪三昧證
得一切佛法普門陀羅尼了知一切佛決
定解莊嚴成就海了知無邊佛現一切衆
生前神通海了知一切佛力無畏法於善
眼佛所卽得念佛三昧名無邊海藏門如

是等十千法門皆得通達憶佛境者華嚴
云德雲告善財言善男子我唯得此憶念
一切諸佛境界智慧光明普見法門多解
脫者華嚴云所謂智光普照念佛門乃至
住虛空念佛門等二十一種有此下二結
勸二初正勸諸餘法門淺則上根不被深
則下根絕分唯此一法利鈍兼收如水清
珠到處便益故當信受行持念佛如種穀
自心如家田信如信栽此種定得成穀願
如知此佳種一心求穀行如欣求得穀作
辦耨事何得下二結責十界因果皆唯心
現若一念心瞋恚邪淫卽地獄界慳貪不
施卽餓鬼界愚癡暗蔽卽畜生界我慢貢
高卽修羅界堅持五戒卽人法界精修十
善卽天法界證悟人空卽聲聞界知緣性

離卽緣覺界六度齊修卽菩薩界真慈平等卽佛法界今此教念佛者欲人念我自心成我自佛云何捨自心佛孤佛教耶如來不思議境界經云菩薩了知諸佛及一

切法皆唯心量得隨順忍捨身速生極樂

基七

十一

淨土照律師問經云是心作佛是心是佛心既是佛何須念他佛耶答祇由心本是佛故令專念彼佛梵網戒云信知一切衆生皆有佛性我是未成之佛諸佛是已成之佛汝心佛者未成佛也彌陀佛者已成佛也未成佛者久沉欲海具足煩惱杳無出期已成佛者久證菩提具足威神能爲物護是故諸佛勸令念佛卽是以我未成之佛求他已成之佛而爲救護耳衆生若不念佛聖凡永隔父子乖離長處輪迴去

佛遠矣所以文殊普賢等諸菩薩皆願念佛往生況我凡愚人耶又彼螟蛉尚聽教成可以人而不如蟲乎不願自棄迷也甚矣

②二略釋經題

楞嚴者一切事究竟堅固也乃大部之總名圓通者聖性法門無不通也是一章之別目勢至者啓教之人也念佛者修行之法也文雖一十二行義括淨土諸典有教有機有法有喻生佛感應以遍含自他因果而該徹作心境之月燈爲聖凡之舟楫故言楞嚴經勢至念佛圓通章

楞下先釋名一切事三科七大也究竟空也堅固不空也合二空不空也蘊處界大本如來藏故事事究竟堅固名楞嚴定既

住法位世相常住故此亦名健相三昧聖性舉理法門約教影略行果可知正顯四法互相圓遍該通也依止成定名爲楞嚴依觀成慧號作圓通別目者以勢至念佛圓通乃修道二十五圓通中一也勢至下

基七

十二

亦影略義具應云能啓能修勢至人也所啓所修念佛法也文下後結歎二先別歎彼佛教我念佛機教也母子形影染香法喻也如來憐念衆生衆生一心憶佛生佛感應也我因念佛入忍今攝念人歸淨自他因果也心境月燈者依我自心念佛境則佛境可彰託彼佛境念我自心則自心易顯此之彰顯皆憑月燈教法以照見也心外有境小教也境唯是心始教也卽心卽境終也非境非心頓也心境無盡圓

也卽所詮法月燈喻能詮教聲名句義門如螢燈小也攝境唯心門如火燈始也理事無礙門如星終也會相歸性門如月頓也普融無盡門如日圓也今約中二以說聖凡舟楫者念名號佛受持皈戒越於三

基七
途下下品生名爲人乘其猶舠船繞過谿

澗念色像佛修行禪善越於四洲生下品蓮名爲天乘其猶艇船出小河港念應化佛觀四真諦越於三界生中品蓮名聲聞乘其猶牒艦過於大湖念受用佛了悟因

十三

緣證二涅槃生上品蓮名緣覺乘其猶艦航過於大江念法性佛智悲並運萬行繁興成無上道超凡小界上上品生名菩薩乘其猶船過大海又持名念佛如特舟聲聞乘也觀像念佛如方舟辟支佛也

觀想念佛如維舟菩薩乘也實相念佛如造舟佛乘也聖凡卽所化人舟楫喻能化

法故言句次總結

④二開章釋文 ②初略標

將解此經五門分別一教起因緣二藏乘教

攝三宗趣旨歸四略釋題名五詳解文義

初二句總敘一下別列此例般若疏意略

開五章前三義門後二正釋

⑤二詳解 ⑥初教興

初教起因緣者智度論云如須彌山非無因

緣非少因緣令得振動念佛教興亦復如是具多因緣一指出捷徑修行門路故二直示當人念自心佛故三欲令悟入佛之心性故四爲顯生佛心無差別故五度脫凡外橫超三界故六接引權小圓成佛果故七充足三

輩無有疑悔故八利益今後周遍無盡故九頓攝六根證圓通境故十疾空障惱定生佛土故

初句標牒智下釋義二先引證如須彌下

喻也念佛下合也一下次正釋楞嚴云初

心入三昧遲速不同倫故知餘門學道紓

迴險難猶如蟻山念佛一門古稱徑路好似風水善導云唯有徑路修行但念阿彌陀佛况今持名徑而又徑者也若欲一生

取辦當於是法留心二下觀經云是心作

基 取佛是心是佛諸佛正偏知海從心想生是

古

佛是心是佛諸佛正偏知海從心想生是故教人念佛卽念自心佛也三下佛心性者楞嚴云我以不滅不生合如來藏而如來藏唯妙覺明圓照法界無差別論云此心性明潔與法界同體如來依此心說不

思議法則知佛以如來藏淨法性爲心也
令悟入者起信云真如自體相者凡夫諸
佛無有增減楞嚴富樓那言我與如來寶
覺圓明真妙淨心無二圓滿觀經云汝等
心想佛時是心卽是三十二相八十隨形
好是故衆生念心佛時卽能悟入佛心性
也四下無差別論云衆生界不異法身法
身卽是衆生界觀經云諸佛如來是法界
身入一切衆生心想中下云若衆生心憶
佛現前必定見佛則此法門能顯心佛衆
生三無差別也五下凡夫外道由見思惑
起業感報輪轉不休依餘法修直至惑盡
始得出離名爲堅出三界唯念佛門帶惑
往生名爲橫出三界如蟲在竹堅則歷節
難通橫則一時透脫桐江法師云堅出者

其七

十五

依諦緣度歷涉地位如取科第須有才學
如歷任轉官須有功効橫出者念佛法門
如人廕敘功由祖父他力不論學問有無
又如覃恩普轉功由國王不論歷任淺深
六下菩薩六心墮落聲聞塵劫不回猶菴
羅華魚子一般因中雖多結果者少若能
念佛圓發三心自然轉權成實回小向大
如彼白衣驟貴平地升仙者然故大本云
菩薩欲令衆生速疾安住無上菩提者應
當起精進力聽此法門又華嚴十地始終
不離念佛圓教登地尚爾况權小初心人
耶七下上品利根聞小教則悔下品鈍根
聞大教則疑所以華嚴會上聲聞絕分阿
含時中菩薩不被今此念佛一法如萬應
膏毒病皆愈似及時雨藥木並茂故得利

鈍盡攝上下均收也八下利今卽佛在機宜利後卽滅後聞見下云今於此界攝念佛人歸於淨土觀經云如來今者爲未來世一切衆生爲煩惱賊之所害者說清淨業故如意珠利濟無盡也九下一切衆生迷常住心用諸妄想循諸色聲違圓通境今念佛也六根都攝守於真常常光現前圓通境發雖不欲證不可得也故華嚴解脫長者云知一切佛猶如影像自心如水水清而靜月現全體又偈云菩薩清涼月常遊畢竟空衆生心垢淨菩薩影現中則知衆生淨念彌陀定放光明心水不淨菩薩圓通月境亦不現矣十下末法修行多諸障難邪魔燒亂佛道難成今修念佛三昧承佛願力威神疾除煩惱頓破無明

五蘊魔銷三身佛現當生極樂佛土成真應二果矣如大明燈然於室中不唯破千年暗而且見種種物然此十因生起有序初以入道多門難易各別出念佛法最爲徑捷二所以徑捷者爲念自心佛故三由念心佛方能成佛心故四佛心若契生佛同體無有二故五既無二別豈有凡外不度脫故六豈獨凡外亦接權小人故七豈唯五乘亦充足一切善惡衆生故八豈但現今亦普利未來無有盡故九濟度如是廣大者爲圓通故十有作之修終成敗壞現既圓通當必見佛歸淨土故又由定生佛土所以指出捷徑門路令預修行疾成佛故如此終始連環猶同鉤鎖此教之興非無因也

四二藏攝

二藏乘教攝者謂三藏之中契經藏攝二藏之內菩薩藏攝三乘之中大乘所攝五教之內後三教攝

二句標章謂下釋相三藏者一修多羅此

基

十七

云契經卽經藏詮於定學二毗奈耶此云調伏卽律藏詮於戒學三阿毗達磨此云對法卽論藏詮於慧學今此經者屬於經藏自始至終專說念佛三昧故二藏者一菩薩藏詮示菩薩理行果故二聲聞藏詮示聲聞理行果故今此經者屬菩薩藏此經演說菩薩念佛圓通法故三乘者一小乘聲聞謂四諦法門運載衆生出於三界到涅槃城成阿羅漢猶如羊車二中乘緣覺謂因緣法門運載衆生過於四空居寂

滅舍成辟支佛猶如鹿車三大乘菩薩謂六度法門運載衆生超凡小境直至無上菩提大般涅槃彼岸成於佛果猶如牛車今此經者屬於大乘以如來憐念衆生勢至攝念佛人安樂諸乘度脫九界故五教者一小教唯談人空故二始教但明法空故亦名分教但說法相故三終教復說中道故亦名實教多談法性故四頓教唯辨真性故五圓教唯說法界故今此經者屬後三教下云二憶念深母子歷生不相違遠終也漸漸念時終當成佛故下云以念佛心入無生忍不假方便頓也知佛卽心疾成佛道故下云都攝六根淨念相繼得三摩地圓也了三無別圓通法界故準知此經教義深廣幽遠非淺近矣

丙 三宗趣

三宗趣旨歸者有總有別總以憶佛念佛爲宗見佛入忍心境圓通爲趣別有五對一教義以教說爲宗令達義爲趣二事理舉事相爲宗詮顯理爲趣三境智三佛境爲宗二觀智爲趣四行位信願行爲宗入不退爲趣五因果以因行爲宗克果德爲趣

三句牒門謂宗旨歸趣也當經所崇曰宗宗之所歸曰趣若不識宗無從趣向矣有下釋義教說者卽念佛教門也達義者謂了達教中所詮心境緣念生佛感應染香入忍自他生土之義也事理義中所具者謂崇尚念佛等事其意云何正欲彰顯彌陀自性淨土唯心之至理也境智理內開者境卽所觀之理智是能觀之心佛之圓

融三身真境也事一心理一心真觀也行位隨智起者信願行三資糧也不退者信淨土離三界位不退也願見佛念佛心念不退也行淨業攝佛人行不退也又信化佛教超凡外道信不退也願報佛果超二乘境念不退也行法佛理超權修證行不退也起信疏云約有三位一信行未滿未名不退但以處無退緣故稱不退二信滿已去入十住位得見法身住於正定故名不退三三賢位滿入初地去證遍滿法身生無邊佛土故名不退由信成信不退由願成住不退由行成地不退地論師云住是證不退行是位不退向是行不退地是念不退由信成證位行成行願成念也因果不退之所成者因若不退名爲真因果

若不退名爲真果信願佛土攝根淨念是
不退菩提因行也得三摩地第一圓通是
不退菩提果德也文有三重憶念彼佛因
也現當見佛果也念見近佛因也心開香
嚴果也念心入忍因也攝人歸土果也如
是五對展轉相因以爲生起

(丙) 四釋題

四略釋題名者有四對義初總別謂楞嚴三
字總稱也總通彼大部故勢等七字別號也
別局此一章故二教義就前別中分教義二
謂章之一字是能詮教也勢等六字是所詮
義也三果因就前義中開此一對謂圓通是
果所證境故勢等是因能修觀故四人法就
前因中分成此對念佛法也卽所稟法勢至
人也是能弘人依四對義立斯名耳

四下標牒有下解釋此句列也初下釋也
總中亦影一對楞嚴義也局也經字教也
通也今不出者恐混濫故章屬能詮者謂
是圓通文字念佛教章也果因對亦可名
境智對圓通境也念佛智也亦可名真俗
理事性修寂行對圓通真理性寂也勢至
念佛俗事修行也四下念佛法者念變化
非受用佛化身小也念受用非變化佛自報終
也念亦變化亦受用佛他報始也念非受用
非變化佛法身頓也念圓通無障礙佛十身圓
也勢至人者得應化佛力小勢至也得功
德佛力始勢至也得智慧佛力終勢至也
此二報得如如佛力法身頓勢至也得無盡佛
力十圓勢至也此亦約教略釋下更詳解
則知此題名內人法雙彰因果並舉理盡

義周故標章首

㊭五解文分三 ①初敘禮白儀

大勢至法王子與其同倫五十二菩薩卽從座起頂禮佛足而白佛言

疏梵語摩訶那鉢此云大勢至思益云我

投足之處震動三千大千世界及魔宮殿故名大勢至觀經云此菩薩行時十方世界一切震動此菩薩坐時七寶國土一時動搖亦名得大勢悲華云願我世界如觀世音等無有異寶藏佛言由汝願取大千界故今當字汝爲得大勢亦名無邊光觀經云以智慧光普照一切令離三途得無上力若依本文能念大勢佛能攝六根妄能接念佛人故名爲勢至也假此菩薩爲發起者表念佛法門能發智光得大勢力

離三界苦取淨土樂也於法自在名爲法王從法化生稱之爲子悲華經云往昔因中彌陀作輪王時觀音爲長子勢至爲次子今在極樂居佛左右助化一切次補佛處故名法王子也與共也倫類也聲氣相應名爲同類五十二者數也表勢至念佛一門能攝信等五十二位諸法行故菩薩具云菩提薩埵肇云菩提佛道名也薩埵秦言大心衆生有大心入佛道名菩提薩埵賢首云菩提此名曰覺薩埵此曰衆生以智上求菩提用悲下救衆生名菩提薩埵也從座起者師資尊卑名分秩然有所陳白不應坐故頂禮佛足者以已上頂禮佛足下敬之至也上皆身業白佛言者上示曰告下啓曰白是口業也身口恭敬意

業可知

鈔梵語下釋人名也先勢至中初約行中修自行也由有智斷威勢故能震動一切亦名下次約願上求佛道也由有想念勢力故能取證淨土亦名下三約悲下度衆生也由有化導勢力故能救拔三途上二自利此一利他依本文者上通諸經釋名此局當經釋也能念三句亦約上求中修下度三義以釋大勢佛者指彌陀言十方三世佛中彌陀爲第一故能念非如衆生不求大勢佛及斷苦法故能攝非如衆生六根攀緣六塵故能接非如衆生自利不耐他榮故有此三大德威勢之至也菩薩名實相稱衆生無勢可知於法下次決王子自在爲王者王以自在爲義故次補佛

基七

主

者彼土彌陀佛後次當觀音補位觀音之後次乃勢至補位猶如儲君暫居東宮後必南面紹王位也與下三與同倫易曰同聲相應同氣相求故曰聲氣相應若依華嚴有八十四同始從念慧趣覺終至不虛出離故名同類如七十三茲不繁錄道不同不相爲謀同心言其臭如蘭故云與同倫也五下四五十二信佛是心信心作佛即攝十信法行住住三昧觀佛實相卽攝十住法行行念佛行度念佛人卽攝十行法行回念佛心向佛心住卽攝十向法行心地觀佛地如佛地卽攝十地法行憶佛念佛去佛不遠卽攝等覺法行心想佛時是心卽佛卽攝妙覺法行則知超凡入聖唯有念佛爲妙矣菩下五菩薩初義約心謂能如是憶佛

卽成大道心衆生名爲菩薩次義約境謂能以念佛心上求佛覺下化有情故名菩薩從座下釋敬禮也意可知者謂意若不恭敬則身不避席口不發言以身口禮白隨意主故所以三業皆修敬者表顯念佛乃是一切世間希有難信之法也

⑦二正陳所證分二⑧初詳引古佛教詔

又二⑨先總明佛出

我憶往昔恒河沙劫有佛出世名無量光十二如來相繼一劫其最後佛名超日月光

疏我者卽自指法身不同情計我也明記不忘爲憶過去稱爲往昔恒河沙劫者約恒河中之沙以數劫顯其久也梵語佛陀此云覺者覺人之不覺也畧開三義一自覺我空揀異凡外二覺他法空揀異二乘

三覺滿俱空揀異菩薩出世者無機不興根熟則現也如來者從真如起來成正覺也十二者大彌陀經云無量光佛無邊光佛無礙光佛無對光佛炎王光佛清淨光佛歡喜光佛智慧光佛不斷光佛難思光佛無稱光佛超日月光佛無量者實智照理無限量故無邊者權智照事無邊際故無礙者慈光與樂無障礙故無對者悲光拔苦無敵對故炎王者光音應化得自在故清淨者離垢清淨發光明故歡喜者令他受用生大喜故智慧者以大智慧破諸惑故不斷者常光不斷絕故難思者本光不思議故無稱者涌百寶光不可稱故超日月者放一切光超日月故俱名光者因中念本覺佛發明心光果上成妙覺佛現

起身光故十二如來相繼一劫者一約能
念表行者十二時中於自性佛淨念相繼
打成一片不得彈指頃念世間五欲則無
量性光自然發明也二約所得則轉十二
類生而成十二聖位轉十二處妄想而成
十二處佛德也然十二佛乃古如來非今
彌陀而其名號同者以師資一道古今不
異如釋迦觀音之類

〔鈔〕我下釋我等二句我有四一執見邪我

二自他慢我三名字假我四法身真我世
人具邪慢學人具慢假聖人是假真今勢
至乃法身大士不同三乘故唯真我恒河
亦云死伽河此云天堂來河從高處來故
乃是無熱惱池流出廣四十里沙細如麵
佛在祇園說法河近講堂故凡言多取以

其七

三七

爲喻梵語劫波此云分別時分俱舍云時
之極少名刹那時之極長名爲劫今取沙
喻劫多久可知梵下釋有等六句始本合
一名爲覺滿我法空盡名爲俱空大彌陀
下引經無量下釋義諸佛名號取證不同
或因或果或性或相或悲智或願行此十
二佛皆以光分名者蓋光有二一智光二
身光復有二義一常光二放光又有二因
一是功德莊嚴二是本願成就今釋佛名
亦約此六義也初二約二智三四約二心
攝二因也五六七八約四身五是化身六
是法身七是他受用身八是自受用身即
楞伽中應化佛如如佛功德佛智慧佛也
九十常光十一二放光自性佛者謂念自
性佛也不得念五欲者觀經云夫念佛者

不得一彈指間念世五欲是謂繫念脫能如此一無間雜無量自性佛先終得發明超於日月也十二類生者謂胎卵濕化有色無色有想無想非有色非無色非有想非無想也十二聖位者謂乾信住行向煥頂忍世地等妙也無漸位者經云從是漸修隨所發行安立聖位故詳如楞嚴七八卷明十二妄想者謂六根六塵妄想也經云六亂妄想成業性故十二區分由此輪轉是故世間聲香味觸窮十二變爲一旋復十二佛德者謂六根六塵功德也經云總括始終六根之中各各功德有千二百詳如楞嚴四七卷明然下通妨難云據大本意十二佛名乃無量壽佛別號唯一佛身此何說言有十二佛相繼出耶故此通

云諸佛同名甚多故十二佛乃是往古非今法藏所成佛也若爾何以今名濫古號耶故又釋云詳彌陀勢至同時發心所師之佛亦同無異而今彌陀十二別號同古佛者表顯師資卽心卽佛之道一也猶今釋迦立號倣同古釋迦佛今觀音名倣同古觀音等故大本彌陀經云過無量佛刹同名釋迦者不可勝數則無量壽佛之名百千萬億不可窮盡何止於一佛耶

(乙)次別示教道二應初標名

彼佛教我念佛三昧

疏彼佛十二佛也語言指示謂之教言念佛者若據事念一心憶想之謂念三身接引之謂佛則能念屬已所念屬佛若據理念念卽始覺佛卽本覺以始合本名爲念

佛念佛有四一稱名謂聞說佛名一心稱
念二觀像謂設立尊像注目觀瞻三觀想
謂以我心眼想彼如來四實相卽念自性
真實相佛初二事法界觀心卽佛故後一
理法界觀佛卽心故第三事理無礙法界

大七

二十六

觀是佛是心故又清涼云約能念心不出

五種一緣想境界念佛門二攝境唯心念
佛門三心境無礙念佛門四心境俱泯念
佛門五重重無盡念佛門會曰一卽前之
初二小乘教也二卽前四始也三卽前三
終也四五前所無者頓圓教也今此文中
約佛教邊四五俱通約機票邊唯局持名
然此持名亦通圓頓不唯局小亦開五門
一持念佛名門心外有佛名故小教事法
界觀也二攝名歸心門佛名唯心現故始

基七

主

教理法界觀也三心名雙融門卽心卽佛
故終教四心名俱絕門非心非佛故頓教
理事無礙法界觀也五圓通無盡門一念
心一佛名遍含法界無有盡故圓教事事
無礙法界觀也梵語三昧此云正定亦云
正思正心行處一心念佛名正定心若他
念者卽名邪思惟也三昧是禪觀通名念
佛是一行別目又此念佛三昧亦名一行
三昧亦名諸佛現前三昧般若三昧普等
三昧

鈔言念佛下釋念佛二字念佛有下明念
佛法門稱名者文殊般若經云衆生愚鈍
觀不能解但令念聲相續自得往生彌陀
經云聞說阿彌陀佛執持名號觀像通二
一觀現在相好光明之佛如法華云起立

合掌一心觀佛二觀綵畫雕塑鑄造之佛如優填王以栴檀作佛像是也觀想者十六觀經云諸佛如來是法界身入一切衆生心想中是故心想佛時是心即是三十二相八十隨形好實相者觀佛三昧經云佛告阿難住念佛者心印不壞釋曰諦了自心名爲念佛如如不動名爲不壞解脫長者所謂我欲見極樂世界阿彌陀佛隨意卽見是也初二下約觀料揀也若依六根稱名攝耳舌觀像攝眼身觀想攝鼻意實相攝六根則一念佛三昧六根無不攝也又清涼下引古明五也緣境者稱名觀像皆屬外境故唯心者依正相好唯是心作故無礙者雙照事理故俱泯者離相如空故無盡者於一切時處境念中普見十

身諸如來故會曰下會通古今也又大疏云古人已有五門一稱名徃生念佛門二觀像滅罪念佛門三攝境唯心念佛門四心境無礙念佛門五緣起圓通念佛門此之五門名則盡善釋義不周故今改之若欲曲會一二卽清涼緣境無礙兼攝俱泯圓通卽無盡門小教等者前之四門約觀此之五門約教互相影顯思之可知今此文下約四五念佛門判今經也佛教十二如來也通四五者以譬如下文中但云憶念佛不別指一門故機稟勢至等也局持名者以佛問下文中方云淨念相繼的指出持名故問何以勢至不通指耶答雖念佛三昧古稱徑路而持名一法徑而又徑何者觀像則像去還無因成間斷觀想

則心麤境細妙觀難成實相則衆生障重
解悟者希至於無盡則境界深廣從何領
荷唯此持名最爲簡捷但能繼念便得往
生如驥驥餘門念佛也雖超羣馬餘門修未及
龍飛持名念佛也鶴冲餘門念已過凡禽餘門修
基行也也爭如鵬舉持名念故龍樹毗婆沙論云
佛法有無量門如世間道有難有易譬如
跋人陸道步行則苦一日不過數里水路
乘船則樂須臾便過千里易行疾至應當
念佛稱其名號本願如是問佛有無量功
德一名難可攝盡況實相中離名字相云
何專稱名耶答極樂依正言佛便周佛功
德海舉名卽盡經云治世語言皆與實相
不相違背豈有萬德洪名不卽是實相耶
然此下重顯持名一門攝盡大小乘教無

論利根鈍根均可依之而修也正定者揀
念佛外皆邪定故正思者於所念境正直
思察故正揀尋伺思揀昏沉正心行處者
謂定心正所緣境異於無明邪所受故或
云調直定由衆生屈曲散亂佛以諸三昧
門令直其屈曲正其散亂故禪觀通名者
如智論云一切禪定攝心皆名三昧是也
一行別目者有二釋一謂萬行中一行如
諸經中或以真如海印德藏爲三昧或以
如幻語言法界爲三昧或有緣有相或無
得無諦等二卽指念佛三昧文殊般若經
云佛告文殊欲入一行三昧者應處空間
捨諸亂意不取相貌繫心一佛專稱名字
隨彼方所端身正向能於一佛念念相續
卽是念中能見過去未來現在諸佛念一

佛功德與念無量佛功德無二若得一行三昧者諸經法門皆悉了知問此教念佛爲念十方佛耶爲念阿彌陀耶答但念阿

彌陀佛以十二如來同名阿彌陀故下云攝念佛人歸於淨土又普廣問佛十方俱

有佛土何以獨讚西方佛言閻浮提人心

多雜亂令其專心一境乃得往生若念十

方諸佛境繁意散不成三昧况諸佛同一

法身念一佛卽念一切佛故問何十二佛

皆教勢至念自名耶答一者十二如來本

願如是如今法藏願云聞我名號乃至十

念若不生者不取正覺是也二者教念十

二佛名卽是教念古彌陀十二別號猶今

法藏教念無量壽佛卽是教念無量光乃

至超日月光也又此下出異名約義配教

念佛小也般若始也佛現終也一行頓也普等圓也如理思之

楞嚴經勢至念佛圓通章疏鈔卷上

音釋

天竺此云月氏

沙門華言勤息

般刺密帝唐翻極量譯易

波羅夷此云乘犯此罪者

阿鼻

阿鼻

釋迦牟尼釋迦翻能仁姓也

他

他

迦旃度此云釋迦翻能仁姓也

他

他

迦旃度此云釋迦翻能仁姓也

他

他

須彌山王唐言妙高

菩提

菩薩摩

訶薩此云覺有情摩訶

訶

訶

羅蜜摩訶翻大般若翻智

迅

迅

萎音信慧波羅蜜翻到彼岸

趁

趁

抵音底音委花草燒退縮也

娑婆此云堪忍堪

惱

惱

幹

幹

躡

躡

諸阿伽陀此云普去能陀羅尼亦云總持也即咒眴音庚犁耨音糲耘修羅舊翻無端田也文殊此云眴蛇音冥令括音郭包楫音妙德桑蟲也括也道路蒙監外狹而長曰艨艟上下四方有板曰艦中船也亦戰船名涅槃此云滅度艦航音禮耀江輪船音亦云圓寂艦航音禮耀江輪船音鄰海中特方維造以舟爲橋者曰造天子大船名舟也蓮四船者曰維諸侯舟也兩船並者曰方大夫舟辟支此云也單一船者曰特士人舟也辟支緣覺亦云紝音迂曲也富樓那華言ழ音蔭庇童蒙獨覺訥翻難分別其果似桃非桃似旬延及菴羅翻難柰非柰花多子少葉似柳味長布也如梨王城種阿舍比法經名也燒音燒擾之果可療疾阿舍音螺文乃蹕前而起者曰儲音除副也牒牒音牒牒又移前文於此曰牒也太子副君謂涌音永泛澗音民雕音影持之儲君澗溢也澗競祇園子國也俱舍翻藏包含攝倣音訪泯音雕塑優填唐言出受王名也梅檀義翻與藥素能除病故驥音記千里

良馬	驥	音紂馬之冲	音充與翀同不飛也
華言	鵬	疾速行也	則已飛則冲天也
樹洲洲中有	之雲	大鵬鳥也翼如垂天一舉而上九萬里遠	此云廣
此樹故樹名勝金	毗婆沙	解論名	
蛙	波	足偏廢尋伺粗覺名尋求	
蛤蟆水虫	跛	細覩名伺察	閻浮提
	行不正也		

楞嚴經勢至念佛圓通章疏鈔卷下 其八

清浙水慈雲灌頂沙門續法集

庚二釋義二辛先修因二壬初舉喻二

癸初二人喻

譬如有人一專爲憶一人專忘如是二人若

逢不逢或見非見二人相憶二憶念深如是
其八
乃至從生至生同於形影不相乖異

疏先喻單憶有離也有人喻生佛二人也

一專憶者喻念佛衆生也一專忘者喻衆
生不念佛也若逢不逢或見非見者以佛

專念衆生未嘗不在衆生前令偶逢偶見
故言若逢或見也衆生專不念佛佛雖在
衆生前亦蹉過不見故言若不逢見也二
人下後喻雙憶不離也二相憶者喻生佛
念同也二念深者喻久憶不忘也如是結

指之詞乃至超畧之詞謂能如是念則決
定時時常相見也從生至生不相異者喻
生生不相離也同形影者謂生佛世世不
捨猶如形影無乖違也

鈔佛專憶者舍二種意一者佛有大悲願

故二者佛在因地自果未圓尚於衆生念
念不捨何況果後更無餘事則念衆生慇
懃懇切無有加故衆生專忘亦有二意一
者衆生無有信行願故二者生在迷位纏
惑業苦人天因果尚不得修何況佛果豈

易得者則念佛心沉埋隱沒不能發故偶
逢見者諸佛菩薩不違本願遊化婆娑故
令衆生偶然逢見也亦蹉過者如見文殊
但覩老人貧婆等類或見本相亦不蒙法
利此由惑業障覆妄見劣相如薄福見寶

爲蛇爲蛙豈彼聖賣作意詐隱其本相衆

生佛念同者謂衆生念佛猶如佛念衆生

相同也久憶不忘者謂時刻在懷雖經年

累月乃至盡形亦不忘也結指者指上相

憶念深也超略者謂不但此生常得見佛

其八

二

乃至他生盡未來際亦常得見佛也乖遠

也異離也形影略舉一事以例不離至於

聲響水波鏡光皆不相捨離也又此形影

近對下喻合文意單顯獲見佛益遠對下

證果文意雙顯獲見佛成佛二益

現當見
佛一益

也心開染
香二益也應釋文云如是一念佛心同

佛也心同形亦同形同影亦同不唯此世

乃至生生世世形影皆同也楞嚴云容貌

如佛心相亦同身心合成名法王子此非

敵對正意故疏不釋

卷二 母子喻

十方如來憐念衆生如母憶子若子逃逝雖
憶何爲子若憶母如母憶時母子歷生不相
違遠

疏上二人喻泛指親友猶覺寬緩故此重

將母子最親切者爲喻使人起信行也於

中亦有二先喻單憶有離首二句即上一

人專憶次二句即上一人專忘如來母也

衆生子也世間慈念最切者莫如母親子

若悖逆忘恩負義母念或衰心生悔恨佛

其三

念衆生更過於母逆惡重者佛念愈深乃

至入於阿鼻地獄伐此衆生受無量苦又

母念子慈止一世佛念衆生慈心無盡世

世相隨無有退轉故云佛念衆生如母憶

子也若子逃逝者喻衆生不念佛而墮惡

道苦也雖憶何爲者喻如來單憶無益也子若下後喻雙憶不離初二句即上相憶念深末二句即上生生不異謂六道衆生慕念如來猶如如來憐念衆生者然方得感應道交生佛不二也故高齊大行和尚云宗崇念佛四字教詔謂信憶二字不離於心稱敬二字不離於口任意早晚終無再住娑婆之法此爲念佛第一要策

鈔泛指者師資君臣皆該在許如來下問前言念佛但念彌陀不念諸佛云何此言十方如來耶答有二意一即指彌陀一佛以三世十方有無量彌陀佛故觀經云從下方金佛光刹乃至上方光明王佛刹於其中間無量塵數分身無量壽佛二通指十方諸佛謂不唯我彌陀一佛悲願如是

即十方諸佛憐念亦然正顯佛佛道同故華嚴問明品云十方諸如來同共一法身一心一智慧力無畏亦然楞伽第四云一切諸佛有四平等所謂字平等語平等身平等法平等觀經云見無量壽佛者即見知佛心專於逆苦衆生之中種種救度如何自生疑阻甘心苦趣耶問逃逝二句與上專忘達不逢義有差別否答亦同不異同者不念佛則不能見佛雖見佛亦不蒙法利此與逃逝無異憶他何爲異者謂前之喻意尚明衆生或有時而念但念之不

切憶之不深故若逢不逢於佛憶猶爲有益此中喻意竟明衆生不唯忘念而且謗佛以不信故墮在三途受無量苦故若逃逝於佛憶則爲無益感應生佛者子喻生感母喻佛應也道交不二合不違也故高齊下彼論云往生淨土要須有信信千即

千生信萬即萬生信佛名字不離心口諸佛即救諸佛即護心常憶佛口常稱名身常尊敬始名深信

⑤二合法

若衆生心憶佛念佛現前當來必定見佛

疏衆生心者揀口念而心不念也憶記持不忘也念繫緣在懷也又初時偶然勉強記憶曰憶後時長久熟脫緣念曰念又憶是暫念一憶之謂念是數憶常念之謂若

事憶念則專心注意毫無雜緣若理憶念則唯妙覺明圓照法界佛亦有二一事相即是三身十身二理性唯是一真法界又事理憶念佛中復各有二一行布二圓融謂先念化報然後法等是事次第也若三事十同在一心是事一時也先空次不空後空不空是理次第也三如來藏心佛同在一時中念是理圓融也問若心外有佛何容理念設心外無佛烏用事爲答心外有佛者由我心佛成彼外佛經云諸佛正知從心想生故須理念心外無佛者託心外佛顯我心佛經云心想佛時是心作佛故須事念若離事理二念何名即心即佛問若即佛是心祇應念心何必念佛又即心是佛祇應念佛何必念心答但執即佛

是心不知即我本覺心性是彼究竟覺佛經云是心即佛三十二相故不妨念佛又執即心是佛不知即彼究竟覺佛是我本覺心性經云諸佛入於衆生心中故不妨念心若心佛偏念即義不成矣問一真法界體無二相何存内外心佛念耶答法界

一真本無内外不屬佛心佛自證窮知生等有欲令生悟義分心佛佛爲外境心爲內境憶念功成自然證知心無佛外之心佛無心外之佛唯一法界普融無盡現前見佛者謂不離現陰於定中見或於夢中見也當來見佛者謂報終陰壞見佛來迎或於花中見也而云必定者有二意一感應道文難思議故謂信得即心是佛專於事念念相好佛故見果報佛來入我心中

經云是心作佛諸佛如來來入一切衆生想中二始本契合法爾然故謂信得即佛是心專於理念念本性佛故於自心中見法身佛現經云是心是佛心想佛時是心即是三十二相此中不合佛念衆生者重在衆生念佛故

鈔憶下唯識云云何爲念於曾習境令心明記不忘爲性定依爲業謂數憶持曾所受境令不忘失能引定故於曾未受體類境中全不起念設曾所受不能明記念亦不生慈雲懶主云凡涉歷緣務而内心不忘於佛謂之憶念譬如世人切事繫心雖經歷語言去來坐卧種種作務而不妨空憶前事宛然念佛之心亦應如是若或失念數數攝還久久成性任運常憶又復覺

心微起惡念即便憶佛以佛力故惡念自息若見他人受苦以念佛心憐愍於彼願其離苦如是相續念佛繫心能辦一切淨土功德若事下謂此中專心憶念及下攝根淨念即彌陀經一心不亂一向專念觀經一心繫念也皆通事理事則能所緣歷心佛分明唯此一念更無餘念念念相續成就定力起信謂以專意念佛因緣是也理則能所一如心佛不二唯此一緣更無餘緣緣心自在成就慧力起信所謂雖念亦無能念可念是也又普門疏云若用心存念無有間斷名事一心若了此念心四性不生名理一心對前四種五種念佛一具此事理二念問前四五門與此事理俱約能念爲義有異否答前之四五乃標

其六
根淨念即彌陀經一心不亂一向專念觀

七

法門方便有多此之事理是約行人用心各別是故四五門中必具一心二心之中必攝四五無混濁也問此中事理與前四五念佛判事理觀何別答前則別判四五門各屬事理此則通判四五一一并有事

理較之前略今細故不同也然此二念中雖不可缺一亦有上智專於理念或有鈍根專於事念或有中人兼於理事皆隨機宜不必疑阻以得見佛利益同故佛亦下問三中法身十中智空身等何亦稱爲事

耶答墮數量三十
數也故屬佛身身相
事也故問起
信云若人專念阿彌陀佛所修善根即得見佛豈非事念又云若觀彼佛真如法身常勤修習畢竟得生豈非理念今何以法不屬理耶答論對報化故屬理念今對一

真故又屬事所以文殊般若明一行念佛三昧先明不動法界繫緣法界等大疏亦云一法界行亦無一故問十身佛獨出華嚴餘所無者云何今教念耶答諸佛說教雖別三十身同故觀經云諸佛如來是法界身如德雲但念十身佛也清涼疏鈔亦云然其念佛三昧總相則一別即三身十身修觀各別三身者謂念佛報化佛於三身中各有依正便成六觀謂念佛性身土爲法身依正念報身華藏等刹爲依十身相海等爲正念餘淨土水鳥樹林爲化身依二十二相等爲化身正十身者謂念佛智法力持意生化威勢及菩提福德相好莊嚴身如是重重成帝網境則入普賢念佛之門詳在六十二卷行布漸次也圓融

一念也利根則圓融下愚則漸次中根則不定又或利根先理後事鈍根先事後理皆隨機便無一定相先空等者且約當部四卷三如來藏心明若對所念理中法界應云先無爲理法界佛次有爲事法界佛後理事無障礙法界佛以法界如來藏同一心故左右言也問下通妨初釋二種念中隨用一種不須兼具難次釋心佛即中隨念一即不必並驅難三釋即心即佛成心佛兩存難定中見者華嚴四十六云若

共九

有衆生專心憶念則佛現其前等六十二云住自在心念佛門隨自心樂現其像故住一切境念佛門普於諸境見佛現故楞伽云諸佛有二加持謂令入三昧一現身灌頂也諸菩薩等爲二持故即能親見一

切諸佛觀經云無量壽佛相好光明徧十
方界念佛衆生攝取不捨故禪觀中皆得
見也夢中見者法華云若於夢中見諸如
來坐師子座圍繞說法彌陀下輩文云此
人臨終夢見彼佛亦得往生報終見佛者
稱揚諸佛功德經云若有得聞彌陀名者
一心信樂其人命終阿彌陀佛住其人前
鼓音王經云若有受持彼佛名號臨命終
時阿彌陀佛即與大衆住其人前令其得
見花中見者觀經下品中生文云吹諸天
花花上皆有化佛菩薩迎接此人如一念
頃生蓮花內經於六劫蓮花乃敷觀音勢
至爲說經典問今有專心念佛於定夢中
亦不見佛又有一生念佛及臨終時亦不
生方何也答專心念佛定夢不見者山其

過去葉障重故現在善力弱故又佛有二
加被一者無障則顯加令其親見二者障
重則真加暗令得益故普賢云有諸衆生
心中發明普賢行者我時分身皆至其處
縱彼障深未得見我我與其人暗中摩頂
擁護令就一生念佛不生方者念佛不精
誠故生疑不篤信故無有往生願故不能
斷貪愛故問現在善根淺薄可以增修過
去葉障深重云何得知而爲對治答有二
揀別一者三昧中若有善根發相則知過
其六
去種植善因何爲善發略開四種一念化
佛善根發相者於念佛三昧中忽然憶佛
修六度萬行成三十二相身有好光心有
智慧說法利生降伏魔怨作是念時生敬
愛心開發三昧增進佛行或於定中見佛

身相心淨信解或於夢中聞佛說法覺悟
佛心二念報佛善根發相者於念佛時忽然憶佛圓滿果報之身皆是無漏功德成就相好光明——無量神通智慧克滿法界相續湛然盡未來際作是念時慧解分明定心安隱善念相續或於定中聞說不思議佛法境界即便出生無量智慧法門或於夢中見八萬四千諸妙相好即便出生無量願行功德三念法佛善根發相者於三昧時忽然憶佛真實性身清淨無相猶如虛空唯是第一義諦無有世諦境界離生離滅無作無爲非來非去不減不增作是念時善心開發入定安樂通達無量法門現起無邊佛境或於定中見佛以微妙法身具諸相好即便覺悟遠離常無常

而現常無常唯識云法身五法爲性非淨法界獨名法身如是悟時開發實智三昧現前或於夢中見佛以諸法如義而爲其品云諸法如實相諸法如實即是佛離是之外更無別佛如是悟時清淨六根法性現前四念十佛善根發相者於禪觀中忽然憶佛法界身雲依正圓融真應無礙——多即入大小隱顯亦理亦事亦人亦法亦此亦彼亦因亦果亦九界亦佛界亦三身亦十身作是念時開發無盡善心出生無盡三昧滅重重煩惱顯重重法性或於定中見無障礙佛刹剎塵塵現身說法即便證知德雲一念佛門出生二十一門如是知後發普賢願行普賢行或於夢中見無

盡身佛說法利生 即便悟入威光念佛三
昧統攝無盡三昧如是悟後發遮那智成
遮那境以上善根皆由過去今生念佛習

報相也

見諸相好悉屬報因相現

二者三昧中若有業障發相則知過去不種善根

何爲障發亦開四種一者昏沉暗蔽業障
發相謂念佛時即便昏睡沉暗瞪曠無所
記別令諸禪觀不得開發二者妄念散亂
業障發相欲修觀時雖不昏沉而生邪想
欲作四重五逆十惡毀戒等事展轉生續
無時暫停因是三昧不得現前三者惡境
逼迫業障發相將入定時雖無妄念而有
惡境或見焚溺或聞震擊或無頭手或墮
山海如是逼迫令其驚怖所發道心障礙
不起四者病事苦惱業障發相當念佛時

雖無上境而身忽然生諸疾病苦惱百端
或爲世間種種事務牽連不斷因是無生
不能證入以上業障皆由過去不善報因
相也因此善惡二法發相即驗自己根性
是善是惡亦知自己在前生時種善不種
善作惡不作惡如是見已善者增修令其
圓滿惡者對治令其除滅云何治滅亦開

四門一治滅昏沉障應教念化佛三十二
相中隨取一相或取白毫相閉目而觀若

心暗鈍懸想不成當對一尊端嚴佛相緣
之入觀若不明了即開眼觀復更閉目如

其八

十三

是想時心眼開豁即破此障無復沉睡二
治滅妄念障應教念報佛所有十力四無
所畏十八不共三昧解脫一切種智不可
思議無量功德普現色身利益一切神通

變化摧伏魔外如是念佛善法功德一切邪惡心心數法自然銷滅三治滅惡境障應教念法佛法佛者即是平等法性空寂無爲無有形相既無形相焉有境界逼迫境界空故即是治滅此障四治滅病事障

其八

十三

應教念十佛緣佛菩提威勢力持本願功德不爲世間事務牽纏緣佛福德相好莊嚴意生身相不爲一切病苦所惱念佛法身猶如虛空隨其智力應化一切非如衆生煩惱陰身入苦交煎世事纏縛如蠶作繭無出頭日如是念時此障即滅故知存心念佛廣大功德無有不成深重業障無有不滅也問念佛佛現亦有魔否念佛所發善根亦有魔作否耶答佛有神通力威德力本願力大光明中必無魔事或有宿

障深厚及不善用心容有魔起須當辨識經論開二一所現相好不與經合者是爲魔事二不與本所修行合者是爲魔事至於善根發相是魔作非魔作亦有二辨一約心境久速謂此見佛聞法等事若是善根發者則報因境相暫現便謝習因善心相續不斷若是魔所作者則報因境相久久不滅或謝去更來擾亂習因善心暫發還滅或倏爾變成惡念二約煩惱輕重謂見善相發時能令心識動亂煩惱增重衆多妨礙不利定心悉屬魔作若見善相現已雖未證禪定而身心明淨善念開發煩惱輕微或三昧開通身心快樂內外安隱氣色光潤煩惱寂寂功德巍巍此爲善發相也若邪正未了應當用二法以對治之

一者止法謂深入三昧一心念佛於所現
相悉知虛誑但平心住定不取不捨如是
息心寂然不起分別時若是聖境則定力
逾深善相如法若是魔境現相不久自壞
縱發亦不如法二著觀法謂觀真空法界

其六

十內

念虛空法佛推檢現相不見生處相空寂
故心念亦寂知魔界如即佛界如離真如
外無一法相如是觀念佛法自當現前魔
境自然消滅然念佛遇魔亦萬中一也良
由修淨業人具三種力一者念力二者本
有佛性力三者佛攝取力云何邪魔得便
擾害故稱揚諸佛功德經云若有得聞彌
陀名者阿彌陀佛住其人前魔不能壞彼
正覺心是故但當一心念佛莫疑慮也而
云必定下釋疑難也妨曰如來者無所從

來亦無所去云何有佛現在前耶故此通
云有二意故佛必定見一約他佛謂法身
真佛本無生滅後真起應不妨來去是故
心淨佛現心垢佛滅其猶水澄月來水濁
月亡也二約自佛謂本覺心佛本無來去

依覺不覺不妨出沒是故心迷佛隱心悟
佛顯其猶鏡塵光暗鏡潔光明也此中下
亦釋疑也妨曰上二喻中俱舍如來念衆
生意云何合內無佛念耶故此通云衆生
無有信願故此再三勸勉佛念衆生乃佛

其八

十五

自願何待言也

④後證果二⑤初法說

去佛不遠不假方便自得心開

疏初一句躡前修因說也次二句正明證
果相也不遠者現前見中事念見他佛則

先色身相佛後法身真佛理念見自佛則先分證覺佛後究竟覺佛當來見中事念

見他佛則先化身佛後報身佛理念見自

佛則先本覺佛後妙覺佛故云去佛不遠不假方便者約事則念佛法門即勝異方

便何假餘方便門以助顯我本性也約理

則念佛即是念心心佛無差自他不二豈

離唯心自佛而假心外他佛作方便耶自

得心開者以念佛心入佛知見圓滿菩提

歸無所得約事則佛果成證約理則覺體

圓顯所得但得見彌陀何愁不開悟是也

鈔初一句下略提不遠下詳釋現前等者

難曰上既見佛今何又云去不遠耶故此

釋云上之見佛乃是色分化本此之去佛

即是法究報妙故不相違亦可由見佛故

衆生與佛同在一處猶如形影不相違遠也

◎二喻明

如染香人身有香氣此則名曰香光莊嚴

疏初二句舉喻法上身近佛身心開佛心

合喻中人沾染香身亦有香次二句出名

謂以如來法身香光莊嚴自心本覺如來

如華嚴以旃檀沉水香等喻菩提心香今

亦以人天名香喻如來法身功德香也

鈔法上下若直約法言謂念佛名香近佛

其六

十六

身香開佛心香鬻香長者所云發心念佛

香是也喻中下起信云如世間衣服實無

於香若人以香而熏習故則有香氣無明

染法實無淨業但以真如而熏習故則有

淨用無明染者本覺心佛藏在無明殼也

彼論明在經如來藏心今經喻出經如來藏心故云心開謂心開成佛以近佛故如身淨成香以塗香故若依相宗立量應云念佛是有法佛心開宗因云去佛不遠故同喻如染香人香人是有法身有香光莊嚴宗因云染香故同喻如念佛出名者出三昧名亦法門名也如華嚴下七十八云如白旃檀若以塗身能除熱惱令得清涼菩提心香能除貪恚癡等熱惱令其具足智慧清涼又如天上黑栴檀香若燒一銖普熏千界菩提心香一念功德普熏法界又轉輪王有沉香寶名曰象藏若燒此香王四種兵悉騰虛空菩提心香若一發時即令一切善根永出三界又如波利質多羅樹其皮香氣一切華香皆不能及菩提

其八

十七

心樹所發大願功德之香一切二乘五分法香悉不能及又波利華一日薰衣薈葛等華雖千歲薰亦不能及菩提心華一生所薰諸功德香一切二乘無漏功德百千劫薰亦不能及人天香者華嚴云人間有香名曰象藏因龍鬪生若燒一丸兩七日香若遇著者皆成金色衆生觸者七日快樂無有諸病摩羅耶山出栴檀香名曰牛頭若塗身者火不能燒海中有香名無能勝若塗螺鼓其聲發時敵軍皆退阿那婆達多池側邊出沉水香名蓮華藏若燒一丸普熏閻浮闍離者離諸垢染羅刹界中香名海藏輪王燒時王及四軍皆騰虛空善法天中有香名淨莊嚴若燒一丸而

我本因地以念佛心入無生忍

疏本因因也無生果也次句徹果該因心

者述已念佛非用分別意識而念乃六根都攝一心不亂念也入證也忍智也無生

約理性言慧心安此無生理故名無生忍

清涼疏云若忍無生理即無生之忍若

約無生之智及煩惱不生則無生即忍無

生法性始終無殊證入法忍地位不等楞嚴第三漸云是人即獲無生法忍信力入

印度經云無生忍法則能清淨初歡喜地

得大無畏安隱之處謂菩薩生如是心我已得住無生忍故生安隱心爲令他住無生忍故起安慰心仁王經云無生忍菩薩所謂遠不動觀慧遠即七遠行地不動即法身香具衆功德亦猶是也

○二略述自己修行二○初自利

於三漸終於等覺今且約等覺說以勢至
位居補處故上句能修證此句所悟證謂
以真正淨念除滅邪妄濁想內想不起外
境自寂內外法空一切無生仁王云一切
法空得無生忍又無生忍亦得名無滅忍

其八

上九

無住忍華嚴云無生忍者不見有少法生
亦不見少法滅何以故若無生則無滅若
無生滅則無住處今念化身佛證得空如
來藏智名入無生法忍念報身佛證得不
空如來藏智名入無滅法忍念法身佛證
得空不空如來藏智名入無住法忍此亦
舉一以攝餘耳若唯忍無生小聖亦有豈
足爲等覺深玄忍耶

鉤六根都攝者返流旋一六用不行也一
心不亂者依一藏心餘念不生也念者心

爲能念佛爲所念念通能所忍智也不消
文清涼疏下鈔云無生忍有二義一理智
雙明二唯就智說復二一智不生即無分
別智體無念慮故二煩惱不生妄想不起
故無生法下判位上句下出得忍所以又

無生下約別相義釋若無生等者具云若
無生則無滅若無滅則無盡若無盡則離
垢若離垢則無差別若無差別則無處所
若無處所則寂靜若寂靜則離欲若離欲
則無作若無作則無願若無願則無住若
無住則無去無來無生無來離欲無作無
願空也無滅無盡無去不空也離垢無別
無處寂靜無住空不空也今念下配釋可
知此亦下通妨也難曰既有無滅忍等云
何獨無生耶釋曰此有二意一者舉總攝

別稱爲無生二者以初攝後但標無生理
實具諸忍也若唯下亦通妨也難曰唯約
無生法理不通無滅忍等有何過耶釋曰
等覺之忍在無滅等故非淺近若唯無生
小乘亦證何足深玄

其六

三十一

今於此界攝念佛人歸於淨土

疏此界娑婆苦世界也淨土安養樂國土
也攝者持也接也生前以威力加持令不
退念臨終以願力接引令得往生歸者還
也此界爲旅亭彼土是家鄉猶如有人因
事遠遊未得歸還今遇親友指示道路速
回家鄉也能攝屬勢至所攝屬行人攝則
雙通能所歸義亦然能歸行人也所歸淨
土也歸兼能所念佛法也有五法門見五

土佛謂憶想外境念佛則生歸變化土見
變化身佛攝境歸心念佛則生劣受用土
見劣受用身佛心境互融念佛則歸勝受
用土見勝受用身佛心境雙泯念佛則生
法性土見法性身佛圓通無盡念佛則歸
法界無障礙土見法界無障礙身佛人者
機也具聞思修三妙慧故備信願行三資
糧故始名念佛人也問設行五逆十惡亦
具三資糧慧得生彼土否耶答雖有諸過
於彼佛土有信行願亦名爲器如三輩九
品中下輩下品是也問念幾時佛得能見
佛生方答隨機不定或盡形持或九十日
或七七一七或十日一日或十念或一念
但能稱名必得見佛況有彌陀本願勢至
攝受豈有念佛不生方耶

鈔此界苦淨上樂者謂此土具八苦生居胎獄老厭龍鍾病受痛疴死悲分散愛則欲合偏離寃則欲逃偏遇求則欲得偏失乃至五陰熾盛而彼國蓮花生則無生苦寒暑不遷則無老苦身離分段則無病苦壽命無量則無死苦無父母妻子則無愛別離苦上善人聚則無怨憎會苦所欲自至則無求不得苦觀照空寂則無五陰盛苦慈雲懶主云不值佛不聞法惡友纏羣魔惱受輪迴墮惡趣塵緣障道壽命短促修行退失塵劫難成此即娑婆十種苦也常見佛常聞法聖賢會離魔事輪迴息無惡道勝緣助道壽命無量入正定聚一生行滿此即安養十種樂也歸義下清涼貞元疏問不生華藏而生極樂者何也答

有四意一者有緣故彌陀願重偏接婆婆人也二者使衆生歸憑情一故若說十方皆妙初心茫然無所依托也三者不離華藏故極樂去此十萬億刹即在華藏第十三層未出刹種外也四者即本師故經云

或有見佛無量壽觀自在等所圍繞既讚本尊遮那之德如是豈非本師隨名異化也事則從此界歸彼界見彌陀居極樂理則返不覺還本覺見自性居唯心問既萬法唯心何以見彼此土有苦樂生佛有來

其八

三

去耶答土有苦樂即心相垢淨生有來去即心性迷悟如是垢淨迷悟總不離乎法界故云心外無法楞伽亦云若一切皆心世間何處住何因見大地衆生有去來
問難
也如鳥喻象遊虛空喻自隨分別而去喻

別識謂從自心空中而後現衆生鳥彼衆生鳥還於自心空中隨分別識去來遊履也無依亦無住如履地而行無依止住處而能令衆生鳥如履平地似有依住也衆生亦如是隨於妄分別遊履於自心如鳥在虛空答釋也前四句喻後合四句聞思修者聞說佛名爲聞慧憶想在

懷爲思慧持念不忘爲修慧佛地論云菩薩履三妙慧淨土往還釋云以聞思修得入淨土故念佛人必具三慧信願行者聞念佛門心不疑貳謂之信信已而解心起樂欲謂之願願已而念心勤精進謂之行彌陀經云若有信者應當發願執持名號雖有諸過等者觀經鈔云此土博地凡夫屬邪定聚發心修行未得不退者屬不定聚已得不退者屬正定聚若生安養不論高下所以者何五逆罪人臨終十念得往

生者亦得不退成正定聚故準知罪人十念即名器矣反顯世人雖行衆善於彼佛土無信行願亦名爲非器也三輩九品者若發菩提心深信因果不謗三寶大修功德專念佛願生彼國真佛來迎坐七寶蓮住不退轉智慧勇猛神通在此名爲上輩也兼利他行若發菩提心深信因果不謗正法少修功德專念佛名回向願生化佛來迎坐蓮花中往生其國住不退轉功德智慧此名爲中輩也唯自利行若發菩提心亦信因果不謗正法不造五逆雖無功德專念佛名十聲一聲臨命終時夢見彼佛亦得往生功德智慧此名爲下輩也缺二利行若七日七夜禮念佛名三心至誠心深心回向發願心六念佛法僧天施戒讀經解義深信

因果持戒利生發心發願回向求生者也
真佛與化佛來迎乘金剛臺即得花開見
佛聞法悟無生忍受諸佛記果也此名爲上
品上生也若五日五夜專意念佛不謗三
寶善解義趣深信因果持戒弘法發大心
願回向求生者因也真佛與化佛來迎乘紫
金臺經宿花開見佛聞法七日後菩提不
退一小劫得忍受記果也此名爲上品中生
也若七日或五夜至心念佛不謗三寶深
信因果持戒利物發大道心回向求生者
也真佛與化佛來接坐金蓮花一日一夜
花開七日之中見佛於三七後聞法經三
小劫住歡喜地果也此名爲上品下生也如
是三品即前上輩所開兼利他行若三日
三夜禮念佛名持諸齋戒發心發願回向

共

二十一

求生者因也真佛來引乘蓮花臺往生彼土
蓮花即開聞四諦法得羅漢果果也此名爲
中品上生也若一日一夜稱念彌陀八戒
十戒發心發願回向求生者也真佛來引
坐七寶蓮經七日開得須陀洹至半劫後
成羅漢果果也此名爲中品中生也若一日
或一夜專意念佛孝養仁慈臨終遇善知
識指示淨土法門者因也命終即坐蓮花生
彼經七日已聞法得須陀洹過一小劫成
阿羅漢果也此名爲中品下生也如是三品
即前中輩所開唯自利行若不謗正法亦
作衆惡命終時聞經名稱彌陀至半日或
半夜者因也化佛來引坐寶蓮華經七七日
花開聞法發菩提心過十小劫得入初地
果此名爲下品上生也若破戒偷盜然不

謗三寶臨終聞淨土法稱念佛名經一時
一刻者因化佛來引坐蓮花上過六力後
蓮花始開聞法發心果此名爲下品中生
也若造五逆十惡然亦不謗正法臨終聞
佛至心十念乃至一念者因命終見金蓮

夫

主五

花滿十二大劫蓮花方開聞實相法發無
上心果此名爲下品下生也如是三品即
前下輩所開無二利行問大本云唯除五
逆觀經云五逆得生二義云何答大本云
唯除五逆誹謗正法則知五逆而兼謗法
者乃在所除也如不兼謗者亦未必除良
由謗則不信不信則不生所謂疑則花不
開是也觀經但言五逆不言謗法則知雖
具五逆不謗法者必定得生如兼謗者亦
不生也良由信則不謗不謗則花開所謂

信則決定生是也下輩下品者謂下輩內
之下品非中上也問大本三輩純明善行
不及惡人止齊觀經前之六品云何今以
下輩配下品耶答有三意一約行因善惡
雖異而位次輩品正同三三成九故今取位不
取行也二下輩與下品十念行同故三五
逆十惡而不謗者亦攝下輩善人中故大
本云地獄鬼畜生亦生我刹中墮地獄者
非五逆人而何若下輩不攝置於何輩耶
盡形持者大本經云一向專念無量壽佛
則知一生持也九十日者般舟三昧經云
九十日中常行常立一心繫念於三昧中
得見阿彌文殊般若云九十日中端坐西
向專念於佛即成三昧七七者大集經云
若專念佛至七七日現身見佛一七者彌

陀經觀經皆云一日乃至七日即得往生
十日者鼓音王經云受持佛號十日十夜
除捨散亂必得見佛大本云一心常念十
晝夜不絕者命終必生我刹一日者大本
云一心繫念於我雖止一晝夜不絕必生

共

我刹十念者觀經云其人苦迫不遑念佛

十聲稱佛即得往生一念者大本云信樂
不疑乃至一念念於彼佛亦得往生問云
何一念彼佛亦得生彼國土一聲彌陀能
滅八十億劫生死罪耶答一心朗念積妄
頓空喻如一燈能滅千年室暗一火能燒
百輛車薪况乘如來本願功德豈可思議
耶故法華云一稱南無佛皆已成佛道佛
名經云一聞佛名滅無量劫生死之罪大
悲經云一稱佛名以是善根入涅槃界不

可窮盡大莊嚴經論云佛世一老人來求
出家舍利弗等俱不肯度以觀彼多劫無
善根故佛自度之即證道果因告大眾此
人無量劫前爲採薪人猛虎逼極大怖上
樹稱南無佛以是善根遇我得度況有下

主六

上明自力此明他力自力復二二者稱念

彼佛力如帆楫二者本有佛性力如舟船
他力即是佛願攝取力如順風三事周圓
必生彼土矣問佛既自來迎引何又假多
少化佛授手耶答顯其功行有淺深故如
共善導千念而飛千光少康十聲而出十佛
華嚴離垢幢菩薩偈云以佛爲境界專念
而不捨此人得見佛其數與心等

①三結答圓通

佛問圓通我無選擇都攝六根淨念相繼得

三摩地斯爲第一

疏初一句牒所問包含衆妙曰圓遍入諸

有曰通又總攝萬化不滯一隅曰圓統生一切無有間隔曰通次五句結能答我等四句出本因先因修無選擇者一揀非那

律選眼空生擇意二外不選六根相

浮勝二根

相見聞覺知性也內不擇六根性根都攝者對上

亦二義一眼不取色乃至意不緣法二唯依一精明心不行六根用故餘念不生曰淨念而無念故一心繫佛曰念無念而念

故相繼謂事則憶念無間理則圓照無間得句後梁證梵語三摩地此云等至等謂齊等離況掉故至到到勝定故亦云等持謂平等持心趣一境故雖通因果此且取功用中純熟一義故名曰得事則成

念佛三昧理則顯本性如來斯爲句歎殊

勝問大本彌陀經云極樂清淨次於泥洹今經據選圓通勢至念佛次於觀音返聞何稱爲第一耶答就楞嚴本經有三意一文殊謂念性生滅因果殊感故第二勢至

謂一心淨念現見自佛故第一二阿難循

聲故返聞爲當根念佛爲不當根佛以聖性皆通歸元無二故稱觀音勢至並無優劣三此方教體在於音聞故以耳根圓通當此方機勢至居次十方法門念佛爲最

共

云

故以念佛圓通當十方機等於觀音約念佛法門中若事念他佛助顯本覺性佛則次泥洹異於觀音若理念自佛直顯涅槃心佛則等泥洹同觀音矣所謂不假方便自得心開是也如此念佛法門不稱第一

而謂之何哉修心者豈可忽諸

釤牒所問者楞嚴五卷云我今問汝最初發心悟十八界誰爲圓通從何方便入三摩地故此牒云佛問圓通也包含下約包遍釋圓通又下約攝生釋圓通又多門入一一門容多名之爲圓如珠懸空映于五色也一入多門多門容一名之爲通如泉潛流穿於十方也根都攝下佛爲能攝根爲所攝攝則通二義中初通事念次通理念上無擇二義亦例此知之等至下圓覺疏翻爲等至等謂平等住持雙離沉掉也至謂能到勝定及至勝位也等持下此依會玄記釋事則成等至理則成等持故開二義也問下通妨也慧覺曰或謂淨土乃聖人之權方所以接鈍根化凡器也苟

能一超直入如來地何藉於他力乎答云馬鳴龍樹天親等諸菩薩皆發願往生應盡是鈍根乎釋迦於大寶積經勸父王淨飯并六萬釋種皆求生淨土應盡是凡器乎一舉心念佛即見性成佛豈非一超直入乎青草堂後身爲曾魯公戒禪師後身作蘓東坡真如詰公後身多憂苦太平古老後身耽富貴海印信禪師生朱防禦家爲女子豈可單仗自力乎若以此爲權將何爲實輕念佛者可不慎歟如此下結顯也若以念佛一門攝生世出世法言之爲五欲故發心念佛地獄界也一爲名利故發心念佛餓鬼界也二爲眷屬故發心念佛畜生界也三爲勝他故發心念佛修羅界也四畏惡道故發心念佛人法界也五

求天樂故發心念佛天法界也^六 欣涅槃故發心念佛聲聞界也^七 慕無生故發心念佛緣覺界也^八 欲度他故發心念佛菩薩界也^九 希成佛故發心念佛佛法界也^十 墓心念佛地大也^{十一} 喜心念佛水大也^{十二} 热心念佛火大也^{十三} 勤心念佛風大也^{十四} 虛心念佛空大也^{十五} 靈心念佛根大也^{十六} 想心念佛識大也^{十七} 念佛旋見眼根也^{十八} 念佛反聞耳根也^{十九} 念佛轉鼻根也^{二十} 念佛還嘗舌根也^{廿一} 念佛攝覺身根也^{廿二} 念佛逆知意根也^{廿三} 念佛觀像色塵也^{廿四} 念佛聽名聲塵也^{廿五} 念佛有味塵也^{廿六} 念佛光嚴觸塵也^{廿七} 念佛觀想法塵也^{廿八} 眼不別色眼識念佛也^{廿九} 耳不別聲耳識念佛也^{三十} 鼻不別

香鼻識念佛也^三 舌不別味舌識念佛也^三 身不別觸身識念佛也^四 意不別法意識念佛也^五 怖生死苦苦諦念佛也^六 息諸惑業集諦念佛也^七 修戒定慧道諦念佛也^八 證寂滅理滅諦念佛也^九 煩惱不生無明緣念佛也^十 不作諸業行緣念佛也^{十一} 不托母胎識緣念佛也^{十二} 色心斷滅名色緣念佛也^{十三} 諸根灰泯六入緣念佛也^{十四} 根塵識離觸緣念佛也^{十五} 不領前境受緣念佛也^{十六} 不貪財色愛緣念佛也^{十七} 不求塵欲取緣念佛也^{十八} 葉無有成有緣念佛也^{十九} 不受後陰生緣念佛也^{二十} 空無熟壞老死緣念佛也^{二十一} 心念佛萬緣自捨施度也^{二十二} 一心念佛諸惡自止戒度也^{二十三} 一心念佛心自柔順忍度也^{二十四} 一心念

佛永不退轉進度也^五一心念佛餘想不生禪度也^五一心念佛正智分明智度也一心念佛成正徧知菩提也^五一心念佛常樂淨我涅槃也^五寂靜念佛空如來藏也^六_{共六}想像念佛不空如來藏也^一圓通念佛空不空如來藏也^二日出念佛先照時也^三食時念佛轉照初也^四亭午念佛轉照中也^五晡時念佛轉照後也^六日沒念佛還照時也^七念心外佛小教也^八念心內佛教也^九念即心佛終教也^十念非心佛頓教也^七念普融佛圓教也^二有佛有心淨念相繼事法界也^三無佛無心不假方便理法界也^七念佛念心入無生忍事理無礙法界也^五若佛若心遍含無盡事事無礙法界也^六一念佛門含無盡

義總相也^七四五義門非一念佛別相也八十六觀等同成念佛同相也^七依報清淨非正莊嚴異相也^八念佛一門攬諸義成成相也^八四種五種各住自位壞相也^八依正功德念佛更周同時具足相應門也^八遍周諸法不離念佛廣狹自在無礙門也^八一根念佛六根都攝一多相容不同門也^八念佛三昧即一切法諸法相即自在門也^八正念佛時餘門不現祕密隱顯俱成門也^七此念佛門一切齊攝微細相容安立門也^八五種念佛互攝重重因陀羅網境界門也^九見念佛門即見無盡托事顯法生解門也^九前後念佛不異當念十世隔法異成門也^九念佛一法帶無盡法主伴圓明具德門也^九念自心佛本

覺也。^九三念佛信心始覺中名字也。

^四念佛

解心始覺中相似也。

^五念佛證心始覺中

分證也。

^六念佛成佛究竟覺也。

^七當念佛

時寂寥無爲法身佛也。

^八當念佛時無德

不具報身佛也。

^九當念佛時凡聖並欣化

^{其六}

^{三十二}

身佛也。^百故知念佛一法攝盡一切法矣。

①二皈命回向

稽首釋迦彌陀佛觀音勢至諸聖賢仰願
三寶加被力今此經疏遍塵刹見聞隨喜
及持說畢竟得生安樂土回此功德向法
界同成無上菩提果

音釋

遮那

此云偏一切處燈音證直贈音蒙昏
也

波利質多羅

此云圓生初利天樹花開

莊嚴衆雜色花周匝莊嚴故又云香

蓋葡萄

偏樹根莖枝葉膚實莫不皆香故

音暗部此云黃色花最香

摩羅耶

翻高山或云牛

形似梔子花其樹高大

頭亦云阿那婆達多此云無熱惱池名也

阿盧那

此云善

赤色羅刹

此云遠疾鬼又須夜摩

此云善

唱妙善

華言知足於五先陀婆

此云善

兜率

欲境知足故先陀婆

此云善

樂故

其香似之酸水馬器皆龍鍾老病貌謂老病貌

香名羅刹

云可畏暴惡

須夜摩

時分時

云先陀婆

今應用酸也龍鍾來腰灣背跎也

此云不可往山也

意羅漢

翻無生應供須陀洹

翻預流

經羅漢

翻無生應供須陀洹

初果也

翻佛立掌

當遑音王心輪音亮

那律

華言貧亦

如浮勝

意謂浮塵根勝義根也

六掉

華言無

淨飯

梵語閻頭檀亦翻即涅槃音轉耳此云入滅

十八界

六根六識也

詰音敷與

申音補

因陀羅網此云天

帝闍

天

刻勢至疏鈔緣起

諸修行中念佛爲最念佛方法莫尚此經疏鈔之作不容已也戊午冬京兆戴復齋先生長公仁長預祝乃翁壽建華嚴會子時首衆嘆至德雲念佛門諦審沉觀其夜夢本師和尚爲講勢至章比曉細研清涼疏鈔遂於臘月八日開釋歷己未元宵閣筆暨夏五月責本請教於復齋戴先生今歲七月望先生囑公即摹刻之公即喜而應命即以此爲起疾延生之公據壽增福益足可徵也梓人曰是佛菩薩佑耶非佛菩薩佑耶余曰當知是經義不可思議果報亦不可思議所以然者或開五欲樂或闡六塵境或爲聲名之蒿矢或結世產之果因如是施資縷本有損無益今刻念佛法門供一人有一人之益供千萬人

即有千萬人之益在一時一處則一時一處益盡未來遍沙界便有塵方億劫之益此則力同勢至願比彌陀攝念佛人歸安養土其無漏功德等於虛空何可以心思言議耶且既得佛心使三寶常住佛不佑之而誰佑歟故此輕小之兆不足疑也衆以爲然命作文勸世普起一切人之信心復翁先生聞之曰茲事茫昧不須遠舉信心衆具廣勸奚爲余曰不然生死一大事也其能脫之之法門豈曰小哉信者雖多莫能常遍今表而出之未其八信者今信已信者令增又何傷於轉勸乎遂記此於疏鈔之末爲流通一助云時三四康熙庚申年十月十一日灌頂行者續法題於慈雲觀堂